



SAKSFRAMLEGG

Sakshandsamar: Jan Erik Boge	Arkivkode: FE-033
Arkivsaksnr: 23/21	Løpenr: 23/10121
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Kommunestyret		

Val av eldreråd 2023–2027 – prosedyre og tidsplan

Rådmannen sitt framlegg til vedtak:

Eldrerådet skal i valperioden 2023–2027 ha fem medlemmer og minst like mange varamedlemmer. Ein eller to av medlemmene skal vera kommunestyremedlemmer.

Val av medlemmer og varamedlemmer skal gjerast av kommunestyret 07.12.2023. Arbeidsutvalet for val av representantar til ymse råd, utval, nemnder m.m. får til dette møtet i oppgåve å leggja fram innstilling om kven som skal veljast.

Invitasjon til organisasjonar som representerer eldre om å koma med forslag til medlemmer og varamedlemmer, skal gjerast ved kunngjering i lokalavisa Samningen og på kommunen si heimeside.

Dokument som er vedlagt:

Regjeringa sin rettleiar for val av eldreråd

Dokument som ikkje er vedlagt:

- Kommunelova
(<https://lovdata.no/dokument/NL/lov/2018-06-22-83>)
- Forskrift om medvirkningsordninger
(<https://lovdata.no/dokument/SF/forskrift/2019-06-17-727>)

Oppsummering:

Det går fram av kommunelova at kommunen skal ha eit eldreråd. Det er i lovverket òg gitt opning for ei alternativ ordning, med eit felles råd for eldre og personar med nedsett funksjonsevne.

Rådmannen tilrår at Samnanger kommune held fram med den noverande ordninga med eit eige eldreråd også i valperioden 2023–2027. Det er kommunestyret som avgjer kor mange medlemmer og

varamedlemmer eldrerådet skal ha, og som vel medlemmene og varamedlemmene. Rådmannen foreslår at valet av eldreråd for perioden 2023–2027 blir gjort av kommunestyret 07.12.2023.

Saksopplysningar:

Bakgrunn for saka:

Det går fram av § 5-12 i kommunelova at kommunestyret skal velja eit eldreråd, eit råd for personar med funksjonsnedsetting og eit ungdomsråd eller anna medverknadsorgan for ungdom.

Fleirtalet av medlemmene i eldrerådet skal på valtidspunktet ha fylt 60 år. Kommunestyret bestemmer kor mange medlemmer og varamedlemmer eldrerådet skal ha. Eldrerådet må ha eit tilstrekkeleg tal medlemmer til at rådet kan utføra oppgåvene sine som rådgjevande organ.

I § 4 i forskrift om medvirkingsordningar er det opna for at kommunen, som alternativ ordning, kan oppretta eit felles råd for eldre og personar med funksjonsnedsetting dersom dette ut frå lokale forhold er nødvendig. I Samnanger kommune har me ikkje hatt ei slik ordning.

Eldrerådet i Samnanger har i valperioden 2019–2023 hatt fem medlemmer:

- ein medlem frå kommunestyret
- fire medlemmer som ikkje sit i kommunestyret

Faktagrunnlag, problemskildring og moglege løysingar:

Kommunestyret avgjer om kommunen skal halda fram med den noverande ordninga også i valperioden 2023–2027 (eit eige eldreråd og eit eige råd for personar med funksjonsnedsetting), eller om det skal innførast ordning med eit felles råd for desse gruppene. Det går fram av § 4 i forskrift om medvirkningsordningar at følgjande organisasjonar og organ skal høyrast før kommunestyret avgjer om det skal opprettast eit slikt felles råd:

- organisasjonar for eldre
- organisasjonar for personar med funksjonsnedsetting
- etablerte råd for eldre og for personar med funksjonsnedsetting

Det går fram av regjeringa sin rettleiar for val av eldreråd at hovudregelen er at det skal opprettast eit eige (separat) eldreråd. Unntaksordninga med eit felles råd for eldre og personar med funksjonsnedsetting, er tiltenkt tilfelle der det for eksempel kan vera vanskeleg å finna eit tilstrekkeleg tal medlemmer til å oppretta to separate råd.

Det har ikkje kome nokon signal til administrasjonen om at det er ønske om å gå over til ei ordning med eit felles råd for eldre og personer med funksjonsnedsetting. Administrasjonen har heller ikkje på eige initiativ invitert til noko høyring om dette. Utgangspunktet til rådmannen er at kommunen bør ha den same ordninga i valperioden 2023–2027 som i dag; eit eige eldreråd og eit eige råd for personar med funksjonsnedsetting.

Det er ikkje lovregulert kor mange medlemmer og varamedlemmer eldrerådet skal ha, men det går fram av regjeringa sin rettleiar at rådet må ha eit tilstrekkeleg tal medlemmer til at det kan utføra oppgåvene sine som rådgjevande organ. For kommunale utval er hovudregelen at dei må ha minst tre medlemmer (ref. § 5-7 i kommunelova), medan formannskapet må ha minst fem medlemmer (ref. § 5-6 i kommunelova).

Det går fram av § 3 i forskrift om medvirkningsordningar følgjande organisasjonar har rett til å fremma forslag om medlemmer til det rådet som representerer interessene deira:

- organisasjonar som representerer eldre
- organisasjonar som representerer personar med funksjonsnedsetting
- organisasjonar som representerer ungdom

Før kommunestyret vel medlemmer og varamedlemmer til eldrerådet for perioden 2023–2027, bør organisasjonar som representerer eldre inviterast til å fremma forslag om medlemmer. Dette kan for eksempel gjerast gjennom annonsering i Samningen og på kommunen sine heimesider.

Dersom valet av nytt eldreråd ikkje blir gjort før i kommunestyret sitt desembermøte (07.12.2023), vil funksjonstida for det noverande eldrerådet bli utvida fram til denne datoen. Det må uansett veljast nytt eldreråd før årsskiftet 2023/2024.

Samnanger kommune har i dag ikkje eit reglement for eldrerådet. Det er krav i § 5-13 i kommunelova om at kommunen skal eit reglement for alle folkevalde organ. Det må som følgje av dette utarbeidast eit reglement for eldrerådet.

Uttalar frå andre:

Det er ikkje henta inn uttalar frå andre i arbeidet med denne saka.

Vurderingar og konsekvensar:

Rådmannen si vurdering er at kommunen bør halda fram med den noverande ordninga med eit eige eldreråd. Rådmannen kan ikkje sjå at det er lokale forhold i Samnanger som tilseier at det er nødvendig å oppretta eit felles råd for eldre og personar med funksjonsnedsetting.

Valet av nytt eldreråd bør gjerast av kommunestyret 07.12.2023. Det vil før dette vera tid til å invitera organisasjonar som representerer eldre om å koma med forslag til medlemmer og varamedlemmer. Slik oppmoding kan gjerast gjennom annonsering i Samningen og informasjon på kommunen sine heimesider.

Rådmannen si vurdering er at eldrerådet i Samnanger også i valperioden 2023–2027 bør ha fem medlemmer, for å sikra at rådet er breitt samansett og består av personar med ulik erfaring og bakgrunn. Ein eller to av medlemmene bør veljast blant kommunestyremedlemmene, for å styrka kontakten mellom eldrerådet og kommunestyret. Det bør veljast minst like mange varamedlemmer som medlemmer til eldrerådet.

Arbeidsutvalet for val av representantar til ymse råd, utval, nemder m.m. bør få i oppgåve å leggja fram innstilling til kommunestyret om kven som skal veljast som medlemmer og varamedlemmer i eldrerådet.